



11.12.2007.

## **Stručnjaci iz sedam zemalja jugoistočne Evrope razgovarali o izazovima zapošljavanje mladih**

LJUBLJANA, Slovenija (ILO vijesti) – Uprkos povećanom ekonomskom rastu, nesposobnost privreda da stvore dovoljno pristojnih i produktivnih poslova posebno teško pogađa mlade, zaključili su stručnjaci iz Albanije, Bosne i Hercegovine, Hrvatske, BJR Makedonije, Crne Gore, Srbije i Slovenije na sastanku ovdje 6. i 7. decembra.

“Podregionalni tripartitni sastanak stručnjaka o pristojnom zaposlenju za mlade” koji su organizirali Ministarstvo rada, porodice i socijalne politike Slovenije i Međunarodni ured rada (ILO) kako bi se razgovaralo o tome kako ekonomski rast može biti praćen stvaranjem pristojnog zaposlenja za mlade ljude.

Nedavno istraživanje ILO-a o tržištu rada mladih na Zapadnom Balkanu i Sloveniji pokazuje da su stope nezaposlenosti mladih u prosjeku barem dvostruko veće od onih koje se odnose na radno aktivno stanovništvo.<sup>1</sup> U nekim zemljama stopa nezaposlenosti mladih je u periodu tranzicije dosegla neslućene visine, iznoseći 62.3 postotka u Bosni i Hercegovini, 59.8 postotaka u BJR Makedoniji i 58.2 postotka u Crnoj Gori.

Prema ovom istraživanju, nezaposlenost mladih ne samo da je konstantno velika već je i dugotrajna: u prosjeku više od tri četvrtine nezaposlene omladine je tražilo posao duže od jedne godine.

Štaviše, putanja rasta nezaposlenosti je usložnjena dodatnim bremenom velikog broja mladih koji su ili nedovoljno zaposleni ili neizvjesnim poslovima, često u neformalnoj ekonomiji. Gotovo 69 postotaka mladih radnika u Albaniji i skoro 60 postotaka mladih radnika u Bosni i Hercegovini su zaposleni u neformalnoj ekonomiji.

ILO istraživanje ukazuje da neformalnost više pogađa manje obrazovane mlade ljude, te također, naglašava da su neformalni rad i neizvjesnost više slijepa ulica, nego odskočna daska za pristojno zapošljavanje mladih. Mnogi mladi radnici su uhvaćeni u spiralu neizvjesnog zaposlenja. Na primjer, ILO istraživanje je otkrilo da je u 2006. godini udio privremenog rada ukupne radne snage u Hrvatskoj iznosio 12 postotaka, dok je udio mladih radnika iznosio 51.1 postotak.

---

<sup>1</sup> ILO provodi analizu o tržištu rada mladih i o politikama, programima i institucijama koje utiču na zapošljavanje mladih u sljedećim zemljama: Albanija, Bugarska, Bosna i Hercegovina, Hrvatska, BJR Makedonija, Crna Gora, Rumunija, Srbija i Slovenija.

Mlade žene prednjače u privremenim poslovima u odnosu na mlade muškarce. U Sloveniji 51 postotak žena mlađih od 30 godina radi sa privremenim ugovorima u poređenju sa 38 postotaka muškaraca istih godina.

Stručnjaci za zapošljavanje mladih su razgovarali o nacionalnim praksama kao i o strategijama i akcijama koje njihove vlade i organizacije poslodavaca i radnika trebaju preduzimati, kako bi se pristojno zaposlenje kako za mlade žene tako i muškarce, i na nacionalnom i na regionalnom nivou, dalje širilo i podržavalo. Oni su naglasili potrebu za koherentnijom politikom zapošljavanje mladih, i sugerisali da vlade i organizacije poslodavaca i radnika proglase zapošljavanje mladih državnim prioritetom, stavljanjem istog u srce ekonomskih i socijalnih politika, te donošenjem nacionalnog plana akcije za zapošljavanje mladih.

Učesnici sastanka su također ponovo potvrdili da efektivna akcija u vezi sa zapošljavanjem mladih iziskuje “jedan integrisan i koherentan pristup koji kombinuje intervencije na makro i mikro planu i bavi se kako potražnjom, tako i ponudom radne snage, te kvantitetom i kvalitetom zaposlenja”.<sup>2</sup> Oni su naglasili važnost donošenja efikasnih i pravednih politika zapošljavanje mladih kao bi se prevazišle poteškoće sa kojima se mladi susreću prilikom dobijanja i zadržavanja pristojnog zaposlenja.

Ministarstvo rada, porodice i socijalne politike Slovenije će pratiti unapređivanje zapošljavanja mladih putem niza foruma o zapošljavanje mladih za vrijeme predstojećeg predsjedavanja Slovenije Vijećem Evropske unije. Pristojno zaposlenje za mlade će također biti predmetom neformalnog sastanka ministara rada i socijalne politike Evropske unije u junu 2008. godine koji će se održati tokom godišnjeg zasjedanja Mađunarodne konferencije rada u Ženevi.

\*\*\*\*\*

*Za više informacija molimo da se obratite Gđi. Edit Horvath at [horvathd@ilo-ceet.hu](mailto:horvathd@ilo-ceet.hu) ili +36-1-473-2656.*

---

<sup>2</sup> ILO: Rezolucija i zaključci Komiteta o zapošljavanje mladih , usvojena 15.6.2005. ILC 93-e zasjedanje, Ženeva, 2005., <http://www.ilo.org/public/english/employment/yett/download/ctpr20en.pdf>